

Ess gibt so Daache ...

Ess gibt so Daache, doo kann derr iwberhaupt nix bassiern.

De Pingst-Mondaach war soon Daach: Doo steihstde moins uff, ziehst die Rolllade hoch, siehst die Sunn enn Aacheblick dorch die Beem scheine unn schunn kennstde peife, wennde nit so enn trockene Hals hättst. Also drinksde e Tass Kaffee mehr unn bist dann erst richdich uffgedreht. Dann guckstde in die Flerschemer Zeitung vom Dunnersdaach, babbelst mett de Fraa iwber die Bekonntmachunge von de Stadt unn lachst, unn bevor de außem Haus gehst, beißt de derr grad noch e Stick Riwwelkuche ab.

Wennde dann on de Stommdisch kimmst unn doi Kumpels lache aach unn dissmol iwber dich, weilde noch Kuchekrimmele in de Mundwinkele hänge host, dann denkste: Peif druff – unn spitzt doin Mund unn schunn falle die Krimmele unnern Disch. Doo macht derrs aach nix aus, wenn ooner sacht, Veechel, die moins so frieh peife, hollt owends die Katz.

Dir dut nix weh, die Fraa hott derr aach fünf Euro ferr doin Schoppe mettgewwe, getonkt hosde schunn om Mittwoch, als de Sprit nor oon Euro siebzeh gekost hott, unn sogar de Werrt erzählt emol enn Witz.

Wennde dann hoomkimmst, stiehts Esse uffem Disch, e Gläsje Woi iss oigeschenkt, de Radio spillt e Klavierkonzert vom Mozart unn die Fraa iss gut druff, weil nix oogebrennt odder iwbergelaafe iss. Na, on so em Daach kann iwberhaupt nix bassiern

Du setzt dich vor de Deller, nimmst Messer unn Gawwel in die Hond, doo sacht doi Fraa: Gude Abbeditt, was hosden om Mittwoch vor?

Unn weilde so gut druff bist, doo sachtstde: Om Mittwoch? - ei nix.

Schmeckt derrs?, frächt die Fraa, unn wennde nickst, macht se weider: Ich misst die Woch emol nooch Meenz, unn om Mittwoch det merr gut basse.

Dess Schnitzel schmeckt unn du nuschelst: Hm, nooch Meenz? Ei klar fahrn merr nooch Meenz. Was willstden dort?

Ich bräucht noch ebbes ferr de Summer, sacht doi Fraa unn macht e Gesicht, als wärsde vorsjoor nackisch dorch de Flecke gerennt.

Koon Grund zum Verschlucke: So, ferr de Summer. No ja, du bräuchst joo werklich was.

Unn wenn dann doi Fraa dich ooguckt als obde Fiewer hättst, nooch doim Puls greift, die Sekunde zählt unn sacht: Bistde kronk? Was essen mett dir los? Sunnst meckersde immer doorum, wenn ich emol in die Stadt will unn heit? Iss was? Loss mich emol gucke ob de derr villeicht Kaffee uff die Hos geschitt host, dann rufstde: Nix iss. Fraa, du host gonz Recht wennde Geld ausgewwe willst, die Ge-

schäfte brauche Umsatz unn du e nei Blus unn e modisch Hos, unn e Paar Schuh brauchsde aach noch.

Doi Fraa konns nit fasse: Isses Audo kaputt, hosde was oogestellt odder was iss?

Dann lachsde: Nix von dem. Ich habb merr was iwwerleecht?

Sie werdd dann e bisje vorsichdich: Ei was hosde derr dann iwwerleecht?

Unn du streckts dich als ob de die gonz Welt in de Arm nemme wollst unn grinst dabei: Waaßde, onn so em scheene Daach wie heit kann derr iwwerhaupt nix bassiern. Dann lachsde sogar, wennse jetz in Flerschem die Gebiehrn ferr de Friedhof erhöht hawwe. Weil on so em Daach denksde: Wenn dess Sterwe so deier iss, dann gewwes merrs Geld lieber ferr Klamotte aus unn bleiwwe oofach noch bisje om Lewe. Glaab merrs, doo wernse seh, wo se hiekumme mett ihre Preise.

Eiern Honnes